

Reakcija Vijeća za tisak povodom izjave Ministra policije RS o Nezavisnim novinama 27.01.2004

Vijeće za tisak Bosne i Hercegovine je razočarano izjavom g. Zorana Đerića, Ministra unutarnjih poslova Republike Srpske o njegovoj namjeri da "nazove vlasnika Nezavisnih novina Željka Kopanju i kaže mu da njegove novine prestanu pisati o hapšenjima u vezi s proizvodnjom sintetičke droge u RS". G. Đerić, iako nije realizirao svoje zamisli u vezi sa "Nezavisnim novinama", ipak, kao i druge javne ličnosti u svojim javnim istupima bi trebao voditi računa o tome kakve efekte mogu izazvati takve izjave i kako mogu biti shvaćene.

"Nezavisne novine", kao i ostali tiskani mediji u BiH, prema članu 6. Kodeksa za tisak, imaju pravo da "slobodno izraze sopstvene stavove", a dužnost novinara je da "poštuju potrebe građana za korisnim, blagovremenim i relevantnim informacijama, kao i da brane načela slobode informisanja i pravo na pravedan komentar i kritičko novinarstvo"(član 1. Kodeksa za tisak).

Stav Vijeća je da ovakav incident predstavlja pokušaj zastrašivanja novinara od strane čelnika MUP-a Republike Srpske, što je u suprotnosti sa osnovnom zadaćom Ministarstva Unutarnjih Poslova bilo koje zemlje, a to je da štiti sve građane uključujući i novinare.

Cilj Vijeća je promoviranje samoregulacije tiskanih medija u BiH. Vijeće je neovisno od političkih stranaka i služi građanima i tisku u BiH.